

曼谷

九谷

亭

集

谷

謾劬亭集卷四

壽陽祁寓藻叔穎

古今體詩六十八首

壬午

大雪退直

正月二十六日

春雪今年過一尺春寒昨夜裂重裘曉來仍戴三星入公
退聊爲半日休每欲移巢憐乳燕轉思泛水狎閒鷗朱門
畫戟都經過懷刺生毛未忍投

仲春感懷

時佐
兒塲

玉璋錦綵費攜持贏得空懷夢醒時翻悔年來嘗百藥雙
鴉難護落巢兒

敢云此恨偏敦我拔劍猶能歌莫哀獨有舍飴難慰藉板

與千里爲誰來

春闈分校呈李芝齡少宗伯次朱蘭坡前輩韵

蕊榜春官特地開文章運會藉衡裁
況逢星日騰輝際爭見魚龍跋浪來
大海求珠憑象罔仙風引棹卽蓬萊
門牆桃李應栽徧猶自巡檐索落梅

戔戔聲價仰龍門冰鏡同懸氣象尊
列坐幸邀青眼顧奇文許共素心論
花因織錦傳新樣燕已移巢記舊痕
自是東風能鼓物一時寒谷變春溫

春闈呈煦齋司農夫子

屈指蘭亭修禊年科名恰在我生先

公以癸丑登第

一朝珥筆陪

趨直兩世論文幸有緣

嘉慶庚申公主試順天鄉試先君時與分校

青鏤花箋

春染翰黃封玉釀晝開筵盟心何以酬知已努力搜羅是薦賢

大金吾典大司農管領兵民職任崇人說歐陽爲士望

帝知蘇頌有家風

文莊公五典春闈

馬蹄徧踏春郊碧

時扈蹕奉欽命

題乘驛而還鳳尾親緘

御押紅十四年來衡鑒在不須爨下怨焦桐

公自己巳巳科典試後至是

復膺是任

再呈芝齡前輩

初聞上閣振鵬鸞又喜煎茶試月團報道滿城花似錦天

教桃李屬春官

先生晉秩容臺而月卽典春闈

至公堂下老槐枝秋雨黃花晝靜時一笑重來圓舊夢錦

囊應和去年詩

至公堂古槐相傳有音聲之瑞先生去年監臨秋試與同事題詠有鏤院聯吟集

覆檢落卷悵然得句

空箱欲棄重低徊束筍叢叢故紙堆未免桐焦餘爨底猶
思錐穎出囊來人如舊雨崇朝別花待春風隔歲開一線
釣竿滄海闊不知何處覓珠回

鈴榜日喜雨

鏤院三旬住乾風竟日吹羣才今入彀一雨竟知時太史
書先奏

君王夢久思萬方殷望汝灑潤要無私

五月十二日奉

命典試廣東感

恩恭紀

舊夢思還合浦珠釣竿眞許拂珊瑚

春聞有滄海覓珠之句

恩深祇媿文章報年少翻驚際遇殊何幸壯游窮嶺海可

能高詠繼韓蘇天南正闕孳經室

時阮芸臺制軍方以經學訓勵多士

文教都由

帝德敷

良鄉塔

出都七十里遙見良鄉塔平岡互縈紆飛欄鬱周帀在昔
歲乙丑於此禮禪榻攬衣躡雲表勢欲排閭闔初窺目眴
轉漸進足雜還石磴旋若螺泥壁光於蠟放慈見仙篆手
痕儼可揭歛然攀絕頂天風來蕭颯精神四飛揚元氣供

吐納俯瞰城郭小但見廬舍合老僧頗矯捷步虛探簷鵠
我心爲之悸呼之了不荅乃知定慧力空境皆實踏浮圖
吾故人一別簪難盍舊游年十三今來歲已并念茲日月
邁恍如波浪沓何時謝征軼心偈參雲衲

涿鹿行館爲程玉樵

德潤

同年作時同奉使

恰值皇華使節催更欣驛館得追陪同年較我十年長生
日遲君七日來

玉樵今年
四十初度

問字道逢門下士論珠人羨越

中才初庚天氣炎歊甚且脫征衫舉酒杯

張桓侯古井

故里桃莊在荒祠漢樹高天心沈火井王氣厄金刀籌筆
嗟無命橫矛志尙豪樓桑鄰咫尺誰爲薦溪毛

自新城抵白溝河

平明出新城積雨猶未歇肩輿曳塗中人力不得竭如墮
甕羅絲滑軟土無骨艱哉扛輿夫十步九常蹶洋洋小青
河一水橫短筏引手招卽至勢不待牽捽乘傳百無苦豈
念道有喝輿夫前致辭爲我言馬卒往者使車來導之行
泥汨陷而入於淖官囊傾倉猝舟子利其賞狼狽爲狡滑
遂令河干地清淺成蕩渥我從輿夫言野渡徑飛越我僕
隨馬行馬腹幾爲沒渡河始相遇淤濺及衣韞并里抵白
溝輿馬論賞罰一笑姑置之我心無艱脆

河上小憩

來鹽去米白溝河帆影都從屋後過好似蕪荑亭畔路輕

舟細雨渡滹沱

趙北口

溼雲下遠樹曉日明空潭引水船通市賣魚花插籃我來
過趙北人說似江南十二橋頭望柔波貼蔚藍

肩輿道覆夷于右臂作此自遣

任邱縣

輿夫本是鉏田夫強使扛輿舍其鉏棄長用短計已左兼
之道蒨多泥塗前肩欲進後肩掣後者崛起前趙趙兩轆
雙杵日掀簸危坐兀若枯僧枯一朝步窘肩亦脫夫仆輿
覆誰爲扶倉卒便令柳生肘逍遙安得尻爲車我謂輿夫
爾何愚不鉏爾田扛我輿輿夫荅言爲役驅新麥登場不
及儲官錢傭夫肥吏胥枵腹乃使充公徒我聞此言三歎

吁臂痛若失心轉紆高牙大纛左右趨當官豈念民艱劬
嗚乎當官豈念民艱劬

早發河間大霧

銀濤萬里壓城來樹影黏天撥不開走馬橫過瀛海驛分
明蜃氣象樓臺

生日次韵荅玉樵

昔年行李困擔囊奉使叨分藻鑑光自媿通經虛壯歲漫
勞織錦報佳章郵亭處處逢今雨杯酒時時話故鄉東道
主人舊桑梓一時言語妙君房

阜城令賈君
循廉有聲

新城令辭午橋

愈炳

阜城令賈淵善

懋功

皆吾鄉人

也乞其致書都下以慰高堂之思

傳語平安慰倚閭忽忽十日兩封書阜城已過新城遠漸
覺鄉音入耳疏

德州渡運河冒雨入行館

避潦尋村徑蹊田傍岸隈斷林颿影出疏雨艣聲來捍水
長隄固闌城列市開挑鐙坐虛館簷滴夜深催

去恩縣十里許憩村樹下

荒邨幾見長官游怪底驚彫吠不休拍水羣兒緣岸上停
機少婦出牆頭沙田雨足農相慶瓦寺鐘殘佛自愁

獨寺用瓦

欲向平原訪遺跡斷林斜日畏淹留

村多草屋

曉行田間聞禽言感作

割麥插禾今年雨多官道成河行人踟躕不敢過回馬踐

我隴上禾踐我隴上禾食我場中麥麥食令馬肥新苗蹂
躪將奚爲年年耕田傍官道割麥插禾不得飽底用空言
聞爾鳥

旅館不寐懷程雲芬前輩

一榻棲如矜挂角中宵警似鶴知更此心已悟蜘蛛隱多
事誰教蠻觸爭涼雨洗頭祛病退新茶潤肺助神清懸思
聽鼓金門客早著朝衣步玉京

東阿道中

墟落遙隨流水灣堆牆亂石自迴環我行平野一千里前
路蒼茫應有山

高樓突兀憶山莊鐵限當門壁作牆滿眼人家渾舊識便

如久客暫還鄉

村中砌樓
頗似吾鄉

余宿東阿之夕夢與徐熙葦應童子試視日已夕余
心頗迫熙葦殊綽綽也覺而用東坡儋州夜夢韵記
之卽寄熙葦

五經紛綸我不如徒手奚能借古書風檐日短苦無餘欲
窮紙尾忘其初徐君在旁意坦舒聳肩搦筆如游魚覺來
歎此夢有緣毋乃造物警我偏我今廢學垂十年繭絲自
吐身爲纏強以文字衡羣賢請嘗試之乃瞿然胡不歸去
披陳編

山雨

山雨如避人挾雲竄深谷行人不自避巧與雲相逐山轉

路欲窮雲行勢已蹙迸出白玉龍噴灑珠千斛青山笑行人土偶遭新沐須臾雨漸歇山溜亂飛瀑卻顧所來徑夕陽在林麓

自東阿舊縣行十餘里近山人家林木明秀如畫

綠樹陰中夕照邊背山面水起炊煙便思往買三間屋不用多營二頃田

夜抵東平

銅城驛距東平州計程百有二十里東阿舊治居其間我行到此日旰矣山雨晦冥石磴滑僕夫勸我不如已我謂前言豈戲耳畏難而退志先靡司勛大夫亦健者謂王樵計同行投袂起乃知誠心天所啟故遣夕陽照流水平原

向人遠更閒野老看客驚相喜須臾莫色蒼然來新月媚
媚出雲底繼之以燭燦如晝沙草微茫淨可指長河乘風
夜喚渡水天浩蕩空涯涘遙看火炬明洲渚漸聽人聲入
城市籃輿載我穩且駛豈知泥深沒屐齒我馬旣瘁我車
殆終夜不來良有以平生茲游信奇絕得毋遇險不知止
書之聊當鼓記里吾姑徐徐焉用此

謁滕文公祠

少年劍馬氣縱橫折節儒冠豈慕名仁政要爲王者法遺
風猶是聖人氓若教國勢侔齊楚未必天心屬呂嬴今日
君臣同廟祀

祠以然友
畢戰配食

滕陽檜柏接鄒城

六月望日銅山行館對月

少年但知月色好不道客愁不可埽兩年對月隴山頭盪
胸一覽邊城秋邇來薄宦將十載橐筆朝朝宮漏待瓊樓
玉宇不勝寒往往鄉心墮雲海今夜銅山月滿輪無心卻
作江南人江南青山隔千里倒影飛落清樽裏頓令溽暑
變新秋但訝空庭如積水海天遙指五羊城快馬輕舸四
十程他時試院煎茶坐可抵籃輿載月行

曉行

曉行出村市流水鳴潺湲日上未過樹雲低猶戀山瓜廬
人睡足石轍草生閒一笑問津吏客游何日還

徐州渡黃河望城上黃樓寄懷王子卿

澤

前輩

東坡先生岷江住直送江流入海去我今宦游逐黃河十

年三度揚帆過崑崙幾曲落眼底蜿蜒如龍走萬里我從
西北歷東南已探其領窮其尾蘭山山下舟爲梁潼關關
外水如湯及入東徐益汗漫陣馬不能追風檣試登堤堰
俯城郭乃知銀漢高紅牆海門遙瞰在咫尺尾閭一瀉歸
蒼茫回頭欲溯浮槎路星宿參差不知處天上何曾風浪
生人間賴有隄防固當時河決潼淵秋飛濤激箭來城陬
要使千家免沈竈豈謀一醉營黃樓樓上風流誰繼起彭
城老守詩才似便向徐州入贛州卻臨河水思江水子卿先生
守徐時有黃樓詩和者甚夥今移守贛州亦入粵必經之道

謁閔子墓蕭縣

人倫有正變孝思無殊致毀親以成名反失聖賢意底豫

固有由頑嚚夫奚黜虞書渾渾爾不言井廩事小弁及凱
風周道亦云墜乘舟心更悲佩玦躬甘棄堪笑潁封人感
君惟一隧寤生實姜出城潁忍相寘左氏且浮夸稗官益
質僞孝哉閔子騫德行誠不愧當時父母言眾口無訾議
蘆衣事有無或者傳聞異世風日衰薄箕帚生詬誶毛裏
自不屬轉以疑賢智墓田在鄉閭配祀仍昆季革蒙閔子
二弟名
家庭有真樂至性誰其嗣我來拜遺像如覩閭閻侍不忍
說單寒恐傷純孝志

河之水一篇 弁引

宿州比歲不登今歲濱河下地又遭浸溢居民掘田
築隄畚鍤相望於道過客感焉故爲是詩也時六月

十八日

河之水何時復侵我田及我屋我屋飄搖我不惜獨惜有
田不如石去年築小隄今年築大隄但願隄似山豈知田
爲谿河伯兩師相娛嬉一笑萬頃黃琉璃可憐禾黍東西
倒盡向中流作荇藻使君昨日乘舟來猶說此間風景好
河干野老吞聲泣早晚官租催已及似聞驛使報安瀾今
歲江南大有年

二蟲

青蠅以腐生白鳥以溼化微哉茲二蟲感時及盛夏鼓翅
各擅能卜晝繼以夜晝如攫金走夜若含沙射薨飛已可
憎陰伺尤堪詫二蟲性貪捷厥勢亦相亞彼此互倚伏紛

擾無休暇我本山中人清涼足茆舍一枕過三伏扇拂常
不藉出山今幾日高明處臺榭遂爲二蟲苦以身試燔炙
拔劍驅未能成雷勢方借願乞金風力一掃炎歊罷復恐
嚴霜早零落到禾稼畫屏亦偶誤紗幬安用下用金樓子齊桓公開
紗幬以進
蚊事二蟲爾何爲寒暑有代謝

過淮二首 鳳陽縣

長淮界南北鐵鎖一橋開飛騎踏波去兩岸以鐵鎖橫
五十艘爲橋好

山迎客來東坡句過
淮山漸好浮天挂帆席對岸起樓臺羨爾觀魚

叟濠梁信樂哉

客館臨淮上清波眼底流虛窗納遠樹高枕數行舟鳥沒

斜陽外漁歸野渡頭晚涼堪濯足瀟灑及新秋時立秋
前二日

月夜淮上

夜涼枕簟滿長街樹影遮門水浸階西舫東船悄無語一
天明月照清淮

鳳陽道中

竹椽茆舍漏痕深飯甑生塵曲突黔村女生來能赤腳驛
名底事喚紅心市瓜解渴無佳味選樹乘涼得暫陰偏是
兒童工笑客倒騎牛背下遙岑

午憩道旁橡樹下

火輪周四極卓午炎曦正百里少嘉樹萬畦爭仄徑忽見
老橡枝蔥鬱動遙興未至心已涼暫憩色相慶聊慰望者
渴一扇暍者病白雲恰飛來助我清陰更霜皮大如象圓

蓋低覆乘緬思同谷叟歲晚飢寒併居然拾其實作歌誰
忍聽物生貴有需好惡紛無定請看道旁李味苦食難竟

寂寥

駟馬前驅負弩行漢家縣令重書生寂寥銀漢乘槎客來

往誰人管候迎

楊誠齋句候迎
銀漢乘槎客

行館桂樹

昔嗟招隱句曾擬楚騷詞小憩桃城館親攀桂樹枝無人
簾捲處過午雨來時天竹何瀟灑幽窗伴更宜

雨後

連朝酷熱苦相煎白汗沾衣日午偏暑雨送涼似秋雨高
田流水入低田舟停渡口仍銜尾雲鎖山腰未放巔行路

欲晴吾豈不老農須此卜豐年

山行

望遠疑無路到來別有天好山多種竹深樹亂鳴蟬澗水東西屋坡陀上下田旋螺行不覺已出翠微巔

登高一俯覽日影散平林始悟山中徑多穿樹底陰人家無市氣潭水得秋心回首臨淮道炎天不可禁

入桐城界度嶺

朝行山之阿盤旋千坡陀自云已出山不知山更多山北路幽折足繭肩相摩山南豁開朗萬點堆青螺羣山亦好勝陵跨森包羅緩步舍行輿直上登嵯峨是時日亭午照耀澗與過山條擢翠巘水葉舉素波因巖草爲厰倚竹雲

成窠忽聞泉石聲乃是松風過蕭然衣袂冷靜若琴箏和
誰家好園亭短牆圍修柯參差見鱗瓦高下帶女蘿徑思
斂柴扃山深愁路訛僮僕促我行欲去仍婆娑夕陽下平
麓殘沙明斷河清景不可失過眼如飛梭冥想苦搜索山
靈當見訶

荅燕語

并引

二十五日宿桐城大雨達旦山水漲發不能行閉門
高卧見梁間雙燕感而作此

借君雕梁住一年來一度不惜銜泥勞喜君無瞋怒秋風
已催客眾雛猶待哺常時簾櫳開出入不相忤今日出巢
來門掩空四顧雙飛亦可憐對話胡遭妬燕燕爾勿驚我

請言其故我亦如賓鴻爪泥聊蹔駐連朝苦霖雨河深不
可渡悶來但酣睡黑甜無晨莫青苔行及榻綠窗偶鎖霧
豈知差池羽忽若羅網細思我負爾巢幕非爾誤客行
良獨難觸處逢牴牾開門送爾去我亦向前路

二十七日發桐城渡挂車河

駕言宿占亭山雨連晨吼行輿衝泥出掉頭復卻走我行
四千里十日雨八九常時冒雨行今胡爲雨守大河橫我
前急溜踵其後一朝凍雨至迷漫失渡口舟楫勢不容沙
石力彌厚傳聞此水性一瀉不能久今日雨稍歇行騰亟
抖擻僮僕色驚怪發言誰執咎高卧吾亦願王事敢重負
出門望四山陰雲正紛糾茫茫挂車河不知能濟否

此河名挂車無車安用挂但令筇輿過僕馬敢云憊未濟
心茫然合眼卽澎湃豈意七尺波陡落一朝快沙擁尙成
隄水銷已分派粼粼見白石人跡儼雖畫此時亦放晴平
灘日午曬沙河弄清漪山影倒而拜天公意不惡河伯氣
亦懈好風吹客衣及時利行邁

聞絡緯

轉轂縑絲響最清北人聞此卻心驚始知唧唧秋蟲語不
是江南絡緯聲

潛山道中十首

山靈喜我馬蹄聲一笑羣仙抗手迎卻被白雲橫截住惱
人眉黛不分明

路似魚腸轉益高山如燕尾忽垂簪平看對嶺青鞵底下
指橫塘綠樹梢

折取松枝壓滿肩樵人未午已歸山懸知細雨山坳路中
有涼棚三兩間

萬緣平川眼底開南山晴日北山雷飛雲莫道無心出一
片隨人頭上來

澗水喧豖勢不平出山便解與山爭林林掉臂穿雲去讓
爾中流自在行

綠玉千竿插水湄四圍種樹當藩籬涼蟬吸慣梢頭露不
肯隨聲過別枝

沙灘齧水軟於肉稻隴吐芒高過人竹裏何曾見廬舍忽

然喧笑聽偏眞

雲壓城頭帶雨濃蒼茫不辨最高峯亦知橫側看難盡轉
過沙灣恰又逢

瀦水南方勝北方但逢隙地便開塘山田犂确成何用亂
插青松當插秧

青山缺處樹彌縫水外人家綠幾重白鳥一羣棲不定恰
疑春雪下長松

太湖城北大雨渡河

陰雲挾石飛狂飈捲林折噴出萬斛珠團作一條雪中流
怒雷吼平地驚濤裂孤舟乘輕危衆峯互明滅神靈變幻
意蒼茫不可說臨河雨驟來收纜雨頓歇

早發楓香驛

草際微明見露光
緣畦行過但聞香
曉風忽颭芙蓉水
紅白幾花開野塘

跨水危橋一木撐
那堪竹轎載人行
明知已上難回步
卻到平途心轉驚

去黃梅縣二十里小憩兩河口隄樹下

湛湛兩河水上
有雙楓樹解鞍息綠陰
冉冉清風度里中
有黃生惠然肯來顧
呼童酌茗椀爲我陳坐具
問荅頗款洽
周旋少世故遙指水外山
云是讀書處愧我抗塵容
企望但生慕
繾綣感良覲
欲去仍緩步
記取霜葉紅歸來當再遇

漫徂亭集卷五

壽陽祁鶴藻叔穎

古今體詩六十九首

壬午

望廬山

我出黃梅六十里隔江已見江西山人言此是廬山背巖
眼頓覺超塵寰屏風幾疊照江水夕陽萬皺明爛斑不知
香爐瀑布在何處但見側峯橫嶺高下雲迴環雲中五老
似回首一一闔露青髻鬢有如蒲阪道中看太華三峯飛
影過潼關黃河曲折走關下亦如大江橫鑲潯陽閒山川
靈祕造物惜每爲好事破其慳我昔西游今南涉勝境兩
遇非偶然書生行勝苦不辦況騎驛馬囊官錢游山如此

亦大好只惜過眼空雲煙買田築室吾不願但願歸途住
此三日窮躋攀

渡潯陽江

五嶽我甫遊其一四瀆我已涉其三彭城渡河曾幾時淮
水鐘鼓聞館館邇來山行又十日屢乘竹筏過沙潭坐看
萬峯走波浪蓄勢一瀉無停涵不有長江鎖疊嶂幾如奔
馬難回驂聞道潯陽有九派北人到此心未諳但喜天晴
風力便檣梢燕子聲呢喃須臾忽失岸西塔宛轉似避中
流酣匡廬作屏江作鏡上下照耀天青藍偶然雲陰落遠
水祇訝日影搖晴嵐蒼茫不辨洲上樹迤邐漸近沙頭龜
卻從下流溯而上參差樓閣臨城南片帆安穩神所勞奇

境紆折吾尤貪此邦天險扼吳楚鑲鑰未許輕窺探江州
司馬古循吏淪落豈爲詩情耽高亭斜日望寥廓江水東
下波如泔

放蜻蛉

蜘蛛吐絲布四屋蜻蛉忽送飛來肉六足四翼非不多誤
墮網羅當柰何與人無爭亦無患我亟呼童解其絆放爾
蜻蛉磔爾蛛罰亦重矣蛛何辜世間快意多危途調飴膠
絲無處無

經廬山下

人說看山閒我謂看山忙一峯到眼看不了忽然萬峯雲
錦張前峯偶蹶後峯壓勢與天地爭低昂此真面目何處

識境過欲追愁輒忘佛華山頭斂精舍苦茗三椀搜枯腸
僧云瀑布勝簾水種種奇觀非尋常笑指門外最高頂炎
天六月秋風涼我今僕馬汗流漿山靈聳謂應避藏安有
清泉與碧巘肯爲俗士回景光石門斤竹句奇僻古來山
賊眞詩狂何由足躡謝公屐看挂銀河三石梁

東林寺

言尋虎谿水一訪東林寺門前幾株松已有高人致坐我
三笑堂虛窗落山翠慧遠與陶陸屏間圖繪具似聞撫掌
語衣帶皆笑意想見山中人方外結同契叔夜龍鳳姿引
領但遙企堂後瞻遺像彌勒龕同侍蓮社十八賢一一鬚
眉備石碣尙唐文

李北海碑
元時重刻

鐵金猶宋字

宋政和十
四年鐫

大可

容一石當時盛檀施老僧今苦飢種蓮幾無地指說屋後
泉卓錫著靈異遇旱水不涸煎茶味堪試吾云宜釀酒飲
事有成例在昔清淨禪獨許淵明醉合掌白遠公拈花若
微示一笑過前谿虎嘯行將至

阮芸臺先生有宋人東林寺圖虎谿在寺外今寺在虎
谿外非舊址矣

并記

荊花

十里紅荊夾道遮紛紛照眼爛如霞尋常亭館栽難得開
徧山椒不當花

雨中發建昌縣

桐城再宿非阻雨自是無船渡河水建昌之水可行舟衝

雨而渡易易耳若云遇雨遂不出三日以往爲霖矣深山
陰晴難豫料萬事倚伏有微理渡江連日看匡廬嵐影泉
聲三百里書生眼福能幾何一雨折磨適相抵建昌老令
秦州士落落鬚眉頗自喜殷勤相送姑相留我謝主人豈
得已

途次大雨

一片聲喧走澗谿天垂雨腳四山齊壞雲壓到村邊樹似
妬簷與不肯低

蹊田羨爾牧牛兒戴竹披椶結伴歸仰視青天如屋漏吾
行安得瓦爲衣

七月四日灘溪紀事

凌晨犯雨行午及灘豁口灘溪一何深亂石挾沙走雨過
新漲添聲疾怒雷吼我僕在前渡我行尾其後渡頭橫野
航破篙竹半朽借問操舟誰幡然一老叟平生負盛氣遲
疑復何有一輩劣可載同舟人凡九

余與玉樵及僕五
與夫二凡九人意

欲泝而上水勢可橫剖豈知灘頭惡放纜卽失手中流幾
翻覆一落千丈陡篙師亟泗水力薄豈能負仰視岸上人
驚喊勢難取稍近東岸樹欲攀復掣肘回波忽向西木石
遭擊培自分葬魚腹瞥然見隄柳眾手競牽挽併力相結
糾登岸一回顧白浪連山阜問渡已五里始悟漂泊久古
寺且偃息衣裳半泥垢覓路歸灘豁曩如喪家狗蔡君慷
慨士邀我意良厚入室更相慰呼兒羅漿酒鄰里看客來

填門紛雜蹂殷勤求筆札投報媿瓊玖夜闌就短榻兀坐
自搔首茲游吁可怕得生亦云偶古來九折阪馳驅爲官
守獨念倚閭望何以慰慈母世路多艱阻賢達宜順受性
命輕波濤冒險夫誰咎挑鐙紀行役蕭瑟風生牖

灘溪留別蔡氏兩秀才

叔維申
姪元選

五里灘頭一葉身天教不死豈無因窮途相識眞奇遇他
日重來有故人黃髮垂髻爭看客青鐙短榻足留賓不辭
書盡君家紙記取樽前醉墨新

東軒

高安試院

東軒長老今何在剩有東軒待客開廳下已無松二本稅
餘安得酒千杯文章豈礙微官謫風雨難忘舊約催城北

城南一條水當年親見卯君來

郡分南北二城中隔一橋卽錦水也

山泉

濁河本藉細流成不是崑崙便不清石磴紅泉太多事在山已有出山情

采棉謠

并序

七月八日道經新淦大熱田間水涸稻枯獨棉有熟者問之居人云不雨已三年矣是日宿金灘岸上作此以哀淦民

高田種棉下土種稻種棉令人煖種稻令人飽金灘岸上多水田九畝種稻一畝棉今年不雨又一月機輪輓河河水竭稻苗無穗半黃朽賸有棉花白似雪采棉作布不作

衣布能易米療人飢但愁棉少布亦稀家家絡緯啼空機
前年苦旱苗盡槁去年青苗化爲草早知種稻不逢年決
計有田惟種棉老農見事例遲鈍來歲旱潦誰能問

宿峽江城宋氏祠堂

市暨惟通路一條女牆高下束巖腰城頭多被青山占峽
口初聞積水消官長清閒伴琴鶴居民生計雜漁樵不嫌
客舍如僧舍鐘鼓聲沈夜寂寥

峽江城南渡江山行

凌晨南出峽江門兩岸青山一水分正是沙平風軟候鷗
鴉無數棹歌聞

山中

人家遠近住山中，築室幽棲細路通。
矮馬祇堪游果下，花豬多半似遼東。
驛馬瘦小，豚多自者。亂松徑仄纔穿屐，碎石灘深不受蓬。
行過板橋三十里，僕夫流汗走呼風。

吉水懷楊文節

誠齋先生

攜來一卷西歸集，行篋頻將好句搜。
今日鳴珂過舊里，江山我亦願歸休。

一疏從容舉衆賢，兩封諫草欲回天。
同鄉亦有平園叟，不

薦詩人孟浩然。

西歸集句：碧琉璃上瓊花裏，獨載詩人孟浩然。

廬陵

文章自昔推歐九，風俗還當問孟嘉。
能使飛蝗無入境，何愁白鹿不隨車。

欲從曾叟覓禾譜且聽髯翁秧馬歌農事今年愁小旱桔
槔挽水已無多

填城溢郭百廛居急就奇觚寫有餘客裏所須無別物止

消冬酒與鮮魚市上酒家以鮮魚冬酒爲常

渡太和江

一夜西昌樹北風搖客窗曉寒生快閣秋雨過澄江穩挂

布帆一間又尺鯉雙用蘇詩語便思黃宙鋪炊飯坐漁缸

雨中至萬安縣喜晤魏芸軒同年綱

出都已越六千里相識曾無一二人今日萬安亭館坐同

年三友笑言親芸軒玉樵皆同榜進士不知江雨寒侵夜祇覺秋堂

煖似春記取灘聲山色好歸舟折贈嶺梅新

阻雨贈芸軒

天公有意留人住一雨居然阻行路曉來獵獵板窗鳴

板窗

鱗次橫排以直木銜之

不知是雨是風聲主人魏侯吾同調灑掃西

廳容嘯傲膏雨隨車亦偶然狂言驚坐君應笑十八灘頭

半日閒

廳事扁額

客行明日又千山千山萬水復何有且盡君

家一杯酒

萬安渡江山行

秋江雨漲沙岸肥惶恐灘頭過客稀一船兩槳如鳬鷖雪
浪打空人溼衣須臾收纜登石磯青山插天天四圍仰穿
翠嶺行徑微黃犢當道不可揮絕巔似有雙朱扉松陰落
落煙霏霏遠望則是近卻非仙乎戲耳應吾譏山中木客

餐靈脂矯捷豈受人世機撫掌一笑逐鳥飛江山如此胡不歸

贛州呈王子卿前輩

贛山三百里奔走赴虔州碧瓦連雲動清江抱郭流此邦風物好八景畫圖留歸棹他時弭乞君縑素秋

曉發贛州十五里渡貢水

染藍無數贛江濱水淺沙明著色新江干多染藍人畫槳輕搖元不惡灘聲何苦惱行人下流卽十八灘

水輪歌

并序

余過南贛諸境見農人以機輪輓章貢二水灌田輪徑圍大可數丈每輻以竹筩斜綴其首吸水上升俯

瀉木槽分注田間視龍骨車以人力輓水者力逸而
功倍矣作歌紀之

水車取水如桔槔若魚去乙存頭尻銜以木舌膚不撓足
蹈手輓生飛濤漢陰丈人老且髦抱甕所得真牛毛豈知
水輪技更高激水自行非人操若渾天蓋圓周遭三十輻
爲一轂牢綴以竹筩盛以槽仰挹俯注聲嘈嘈海蟹如山
擎巨螯歟然噴沫遭煎熬我昔見之金城濠厥製視此差
輦毫蘭州城外以機輪輓黃河水灌田尚不似此之便捷井陘水磨鳴鼓鑿灌田利
不敵江皋江水日夜流滔滔隻輪飛作千畦膏農夫酣睡
舟子囂水淺無力行舵篙昨宵雨起萍翳號晚稻一熟鴻
無磬江上機輪更不勞

七月二十日度梅嶺

憶昔懸車西度隴天寒木落山荒茸十年清夢寄梅花鵬

鵠喚人雪毛毵揭從嶺北走嶺南親踏梅根訪梅種梅家

臺候老不死骨作青山花作冢嶺以梅銷得名九磴螺盤鬼斧開

萬峯虎踞神倉輦南康記大庾嶺形似廩庾行商負戴連尻雕爭道攀

緣接頂踵炎洲氣候一嶺隔鎖鑰咽喉百蠻重挂角寺高

雲易封曲江功大人思奉寺有張曲江祠當年峻坂闢南荒此日

煙嵐爭北拱題石惜無舊跡留補梅喜見穹碑聳嶺少古梅今存

者多乾隆時總督吉慶補藏有碑刻寺壁請看夾道三百株瘦幹欹斜漸擁腫

僧云此山花特早十月梢頭暗香湧攜來嶺外萬戶春歸

向尊前一枝捧祇恐老梅厭送客冰肌未許貂裘擁蓮龕

彌勒笑拈花吾願不奢神其寵

梅嶺謁張文獻公祠三首

感遇篇篇筆有神文章風度冠諸臣莫言金鑑千秋事且
與梅花作主人

翠螺九磴插雲煙手摩南荒一綫天丞相祠堂今尙在黃
金不用鑄梅鋇

畫像曾經吳道子御題猶識宋淳熙永豐市上流傳本合
爲先生勒此祠

泊田子磯

纜身打水一條雪旗腳搖船三尺風坐看歸雲翻樹黑猶
餘斜日墮巖紅

舟艤沙灘對石磯金蛇出沒掣雲飛分明幾點江船火散
作一川星斗稀

卧聞舟發

蘆被方酣睡螺鳴攪夢回窺窗殘夜月撼枕急灘雷水調
鷗鴉發山城鼓吹來韶州今日到津吏莫相催

舟行書所見

亂插魚標竹作欄無端激水忽成湍老漁辨此非無意要
看輕舟過急灘

南來行盡萬崎嶇側視橫看總不殊豈意雙峯特奇絕青
螺佛髻對浮圖

望韶石

雙闕峇堯鎮南國山川草木麗今茲

用方信儒雙闕銘語

韶州太守

曾題石蜀國先生爲賦詩我亦乘舟窮奧域天教撥霧出

眞姿好風吹下簫韶奏不用淒涼弔九疑

郡國志韶石以舜登此奏韶樂

得名

韶州換船南下雜詠八首

繞城一水鎖千艘樓閣連山十丈高官吏不辭迎候苦臨

湘亭上看秋濤

湘江卽曲江上有臨湘亭

韶船軒敞勝南雄板濶桅高戶牖通江水漸深流漸駛送

人況有一帆風

水程西去接昆明憑仗舟人指點清可惜青山無數好雲

煙過眼不知名

蠻語朱離誰解得漁歌歟乃我猶憐順流不覺船行疾卻羨人家上水船

日行百里少人家惟見江邊斥堠斜何處青山猶放犢滿林紅日欲歸鴉

沙洲晚泊好攀登山似濃雲水似冰歸向舵樓眠不得自開紗網翦秋燈

蜚子磯頭紫翠巖石屏萬丈若神劖舟人慣識風波性桿索雷鳴正挂帆

武溪淫毒惱人行瀧吏詩歌不忍聽聞說漢唐碑碣好王禽隸古羽皇銘

觀音崖

英德縣

石髓何年剩裂痕巨靈高掌跡猶存仰撐巖壁危將壓下
瞰江流急欲吞萬竹縱橫梯洞口時方修葺洞口一船塲
漾鎖雲根天南景物多奇駭試問蓮臺不二門

峽山飛來寺用東坡詩韵

渡江陟羣山車懸馬亦束過嶺駕輕舸看山飽眼福順流
借風利浩蕩檣帆簇坐送一江水截破兩崖綠奇觀忽呈
露前境皆庸熟古寺倚峽山虛堂啟帶玉堂僧如枯木定
坐有靈草蓄寺僧施藥我經匡廬背路阻康王谷豈知淙碧軒
雪瀑下巖屋一洗人間塵翫此霧中縠飛來階可升直上
汗如浴何年福地開未厭凡蹤辱峽神亦好事殿宇遭鞭
督至今老榕根擎石怒猶酷古碣厄蛟龍洪濤不可掬寺無

古碑僧云明時蛟發寺圯盡沒於水空聞水底犀金鑲出魚腹翠屏人面起

苔磴峯腰促白足若猿猱捷下車轉轂阮俞動清吹帝子遺芳躅還坐直指堂憑闌盪心目汲泉煮香茗說法甘於肉林深虎跡馴海近潮痕縮僧臘無甲子豈記亥身六請看遊山句

寺有國朝諸賢留題詩刻二卷其前代名作已入山志

別有傳鐙錄二禺風雨多大石齧吾足解舟辭釣磯峽口江搖燭

贈曠元上人次阮芸臺前輩韵

我行七千里經此峽江曲一葉真飛來風馬無羈束上入產南海苦志嚼冰玉來參達摩石不出禺陽麓洗耳聽淙碧定心觀凝綠行年七十餘拄杖不用竹歸猿古洞口夜半昇初旭山空本無猿妙諦尋自足大海生潮音來疾去

亦速學道我未暇師言信可復

曠師言山中無猿

芸臺制府前輩修拓號舍新成賦詩見示次韵

持節聲傳五嶺間憐才心苦爲瓊寒試看無下羣英集何
止階前尺地寬大海魚龍爭鼓舞高秋風雨總平安杜陵
突兀猶虛願廣廈如公手闢難

次韵芸臺先生甲子監臨浙闈和坡公試院煎茶作
曲江江頭夜漲生南海海上秋潮鳴我昨乘舟過清遠一
葉走峽驚毛輕禹陽老僧七十二煮茗留賓無俗意新柴
活火隨手煎飛瀑自汲山中泉我時得隴更望蜀欲乞龍
團漱鳴玉竭來試院腸苦飢海水到吻攢雙眉主人知我
病坐渴剖符調水肩相隨把公此卷笑開口想見西湖潑

乳時

九月十八日同年梁青厓中翰

謫如

馮默齋

奉初陳

華林

鳳池

兩明府招飲越秀山

嶺草蠻煙送客秋
銜杯同醉越山樓
鏡中咫尺能千里
海外傳聞更十洲
歷歷青林圍遠塔
蕭蕭黃浦識歸舟
與君開口成三笑
何日重來續此遊

廣州火

炎方九月天
蘊隆陽氣發
洩無全功
邇來不雨且一月
火輪爍地煙飛空
羊城大賈厭歌舞
豈識流汗茅檐窮鳳鏝
龍燭照街巷
以火禳火何夢夢
炎官熱屬從祝融
下戲南海驅神驄
是時旣望越
三夕雲垂水
立號北風有聲夜半

起城闕其氣上燭爲長虹飛電一掣萬家赤驚飆忽轉千
街紅水車噴激勢益烈如灑片雪洪鑪中大宅高臺盡焦
土珠簾繡幙隨飄蓬貪夫持刃衛其貨強者劫貨刃其躬
攢雜嗽嘆衆渲沸凡三晝夜光熊熊我時扁舟辭南國阻
風海幢參琳宮夜深對岸見餘火飛焰照水流霞烘閉窗
兀坐自歎咤天道倚伏誠張弓此邦市舶萃海澳自昔富
商逾愷崇連雲甲第十三族日以侈麗爭豪雄那知懷寶
適自賊得非賊室遭神恫珊瑚寶玉安足惜民命忍化爲
沙蟲造物於人何厚薄盛衰盈昃常相攻誰歟徒薪計不
早坐視焦爛呼蒼穹我欲斲雕返太樸淫巧毋使干天公
蘭熏膏煎豈人致燬幕焚巢由內訌當今

聖皇躬節儉異物罷斥蠻夷戎四方水旱入

黼座一夫饑溺關

宸衷請卽馳章告

九闕下令流水蘇疲癯

阻風海幢寺

主人約我遊海幢三日火作中心懣辭之徑去登蘭艤倉

卒莫聽鐘魚捩北風打頭奔怒瀧柔纜如鐵聲淙淙急維

寺前鑠高樁二客相送渡珠江龍生元微梁生逢泰自順德泛舟相送褰裳

小涉橫石扛入門古榕千翹幢寺僧導我足音楚沈沈佛

殿高且龐迴廊幽室盆蘭汪有場有圃兼耕耜廚煙日午

閒雞彪一飯坐我玻璃窗手出妙繪牙籤琰是唐貫休筆

越雪從來不到地偶然飛影上槎枒巡檐欲折還惆悵恐
是羅浮夢裏花

南康舟中

過嶺纔三日行旃已半年艣聲寒雁急灘影碧螺圓澤國
饒魚飯山人熟蔗田推蓬見來路松竹翠微邊

來時例
由山驛

泊舟小蓼灘

十八日

撥開蒙密路歧斜臨水荒邨見數家山作屏風松作障門
前無限白茶花

連日江風惱客行灘邊亂石怒縱橫燒柴煮酒聊閒醉卧
聽鄰船試艣聲

下灘歌

客行且莫愁聽我下灘歌灘水一何疾灘石一何多遠望
不見水但見石嵯峨嵯峨三百里自贛及萬安浩浩章貢
水合流經其間舟行亂石罅十里磨九灘大者十有八險
絕摧心肝天柱石最奇鼎立當激湍羅門望拗門白浪排
銀山蘆岡努機灘其水如發機銅盤千萬堆森列儼旌旂
石上橫破舟木柿漂中流昆侖鬥珠雨武朔嬉魚猴灘石名
下有大小蓼上有大小湖龍堦與鳬頸過者長歎歎不獨
惶恐灘一葉隨浮沉孤臣泣道路烈士悲古今其餘諸灘
險步步皆崎嶇數之不能終言之愁客心客心且莫愁客
行今及時此灘冬夏間漲涸行皆宜水漲大石沒灘過舟
不知水涸石闖露篙舵力易施只愁水平漫暗石如伏龜

艱哉一綫路盤曲何其危舟子不敢過低頭拜灘師灘師
向灘老未老白鬚眉請聽灘師言灘行良獨難上灘蝸緣
壁下灘箭離弦操縱偶失幾十碎無一完客行及初冬北
風天正寒但見灘頭石峻嶒生波瀾豈知旋渦處下有劍
戟攢我欲竟此歌此歌不可聽裂地怒雷鳴四坐歎且驚
不如飲卮醪一醉身世輕我歌勸客行莫聽江灘聲

清江舟中書事

漫恃輕齎去故鄉萑苻蹤跡亦須防白衣搖舫風波惡紅
袖浮家子女忙卻恨同舟難共濟空思約法有三章奪金
剽吏尋常事誰向蘆中覓劍鋌

兗州道中二首

水落田猶石冰消路已泥纔能辨牛馬未暇問鋤犁墟里
人煙聚官困米價低復聞寬大

詔哀痛慰蒼黎

春澤先冬雪南薰變朔風宣仁知政善弭盜在年豐自是
民生苦非關吏治窮改弦無太急繁興信難工

漫仇亭集卷六

壽陽祁寓藻叔穎

古今體詩五十一首

癸未

癸未新正二日

重華宮茶宴退直恭紀二首

宮漏聲稀曉鑰開

龍章飛舞下雲來

茶宴聯句例於歲前進呈至宴日復奉

南齋翰林繕稿御製恭獻和章

臨軒已拜如天福

每歲嘉平朔日御書福字頒賜臣工

重華宮

授簡還徵作賦才
貂珥兩行傳絡繹
霓裳一曲任徘徊

至尊含笑

溫綸出珠玉揮豪莫漫催

憶昔城南尺五天晴窗手寫柏梁篇

嘉慶己卯庚辰兩年茶宴聯句稿本臣黃

鉞屬臣

豈知座上金蓮炬得傍

宮中玉茗筵珍翫捧歸慈母笑新詩鈔出外廷傳

微臣

際

此尤榮幸黃髮班行最少年

辛巳春蒙恩入直南齋時年二十有九

春雪早朝和雲芬前輩

點綴朝衫響佩珂回風拂曉舞婆娑初驚萬樹搖銀海已

報三山獻玉禾鵲鵲餘寒隨

輦下鵲鸞佳興入詩多簪豪退直渾無事且和陽春白雪

歌

初居澄懷園次壹齋師韵三首

池冰未泮雪留痕連日春寒各閉門獨有先生開口笑舊

栽修竹徑猶存

齊相何曾厭敝廬
鄴侯只喜得新書
爾來公退清閒甚
作字吟詩興未除

近光樓畔月初圓
直舍還依尺五天
十載游蹤堪記取
荷花亭館柳橋邊

賀雲芬新居

上清仙夢紫宮環
坐對花甌日影閒
槐巷街頭車並軌
米家園裏水同灣
卜鄰我欲誇元白
獻賦君方擬馬班

頃與君應

制謨元夕觀燈賦

更喜幽禽能解語
新居已近畫眉山

雪中侍班歸疊前韵荅雲芬

螭頭龍尾路回環
影靜千官出入閒

紫殿初開催玉漏紅牆幾轉隔銀灣退朝尙控游春騎覓
句先呼視草班粉白花牋青鏤管憑君侔色寫西山

再疊前韵和雲芬

我室蕭然一堵環君家花木繞庭闕階前怪石棱棱立屋
後清流曲曲灣近歲著書同癖左時方奉命編輯春秋左傳讀本雄心
投筆尙懷班長卿自有淩雲氣不數淮南大小山

雲芬索余奉使粵東詩草三疊前韵荅之

珊瑚樹大海波環釣罷歸來意轉閒眼底貞陽雙峽水袖
中黃木九秋灣欲將汗漫遨遊句寫贈承明侍從班只恐

杜陵詩筆健一時傾倒劍門山

君前歲典試蜀中

喜田季高來訪

春風三日狂似虎春雪一園化爲土夢回吹我屋角松作
弄寒聲滿庭戶今朝風息天更晴初日當檐高丈五睡足
方因休沐閒興來卻喜朋簪聚清譚偶爾出餘技腕下蛟
蚪走且舞

季高爲余篆刻小印

知君意致良不惡與我交游一何古

酒酣送君騎馬去疏柳清池照亭午記取百花生日時君

但能來休問主

此正月下旬作也未幾季高入直南齋以二月十五日居澄懷園末句竟爲之兆

壹齋師見和環字韵詩班作斑復疊奉酬二首

几淨窗虛竹木環安排筆硯劇清閒
暫移積水潭邊宅小住丹棱泝下灣
春燕似迎會宿客綠苔猶記舊時斑
眼中二十年來事願就先生聽說山

圖書底用百城環退食吟哦足破閒
檢點林巒添畫稿句

留魚鳥媚春灣新茅更拓三間屋老筆能生五色斑正喜
從游親杖履漫勞歸思向湖山

送程春海前輩視學黔中

君才玉佩更瓊琚十載聲華滿石渠墳典遠探周內史文
章高擬漢相如錦城桃李新垂蔭羅甸山川待著書獨有
同時香案吏臨筵分手重躊躇

都門祖道集羣賢悵望輶車路七千人說文翁能化俗我
知武庫善籌邊屏風詩句

君恩舊紗幔經箱母教先天上彩雲看不遠好將銀管寄
花牋

清明日壹齋師以張文敏公

照雍正壬子怡園看花

詩卷命題卽席奉和

食筍齋前花怒生澄懷園裏過清明一年杯酒醉今日二

月池臺春有情誰人走馬寄詩卷

此卷爲華亭張詩船舍人家藏

矮紙斜

行墨痕徧頓令先生笑口開卻思佳節前賢擅王子看花

今幾時韶光九十風煙馳三篇珠玉尙書筆九曲文星侍

講詩

文敏與顧侍講成天酬答凡三篇九曲文星謝世塵乃侍講卷尾題句時文敏已故侍講懷舊故有此語

怡園宛平王相國熙別業也

當時壇坫尊前輩張顧聲名滿

禁內而今蔓草沒怡園何論東坡與孟載

文敏詩云上言王子六百年吉

祥寺花紅簌簌下言王子三百年孟載西江曾有作

詩香紙味逐春風此卷宜歸几

研中請看唐堂數行跋其年其姓將毋同

黃唐堂之雋跋時年七十四今

年先生亦七十四

況是芳園好時節石泉榆火都新潔先生醉舞

任婆娑

用香山七十四歲詩句

弟子從游更羅列興來健筆敵韓潮

吟罷春林花亂飄金谷詩篇懷往事平泉草木說前朝君

家畫法宜垂久風流直接百年後莫誇張氏上河圖且乞

伯鸞寫生手

黃筌子居宋字伯鸞

題煦齋夫子惜驄馬圖

九門鑠鑰一夜開金吾將軍騎馬來馬前緹騎擁大戟闕

城溢郭歡如雷明日都人爭動色報道將軍已擒賊將軍

神勇人不知但見驟耳隨風馳風馳電埽無留盼蹴踏紅

塵來白澗來時

行殿午陰斜卻到都門未晡飯將軍報

主不愛身馬亦宛轉從將軍草中狐兔復何有天上騏驎

自不羣當時畫圖撫駿骨鐵腕花鬟氣鬱勃卽今玉勒擁
沙隄猶想連錢錦障泥將軍功大心更厚念舊惜勞及奔
走自是風塵物色難定知詩句流傳久我欲范銅寫此馬
置之黃金古臺下驂騑騷裏世間多不過孫陽當奈何癸酉
秋林清之變公以步軍統領隨扈白澗行宮
聞信卽乘此馬馳歸京師不三時行百四十里

許溟生遺徽墨柿霜賦謝

燒松作墨來黔縣搗柿成霜出豫州點漆團酥皆絕品良
朋嘉貺媿難酬好裁紅葉棱棱影爲寫黃山寸寸秋況有
園林供畫本憑君浣筆頽清遊

春雨和溟生

春雲變幻走龍梭春雨廉纖織水波計日看花知有信隨

風入夜聽還多趨朝不礙霑衣溼退食相期墊角過聞道
青旗臨別館東菑早晚起農歌

食筍齋海棠盛開次左田師韵

都下春寒花事遲初開已落清明後江南春暖風物妍草
長鶯飛時已久一日看花千百回煙霏雨溼雲霞開卻笑
川紅減顏色折枝草草供瓶罍爾來鄉夢苦未足竹石槎
枒尙撐腹舊栽新種盡成叢獨有海棠高過屋師云此花乃朱文正
公盆景移植二十年來幾度看花時往往風沙間每歲扈從多在
斯齋之西月間今日主人對花飲綠陰高護春風寒金谷飛觴恣宴
佚錦雞綵鳳求能得豈知冷眼看花人長觸牆東但遙憶

三月二十九日

恩賜軍機大臣 南書房翰林牡丹人各二枝恭紀

第一天香絳樹仙捧來猶帶

御鑪煙芙蓉闕下承

恩近芍藥闌中鬥色妍入夜定飛雙玉蝶殿春應占百花
賤祇宜珍重

丹毫寫未許尋常綵筆傳

題魏春松丈

成憲

馬塍菰花圖

焚罷南臺草歸看北郭花湖山閒作主詩酒老爲家文豹
常思隱神羊不受邪祇愁寄園樹藤蔓漸藏蛇

題歙縣相國夫子華洲餞別圖

登瀛自媿識韓遲趨步花輒日影移一代楷模多士式

三朝勲業百僚師從容退食陪清譙
棖觸披圖檢舊詩
十六年來江渚上飛雲捲雨似當時

清華水木傍湖東
迤邐橋亭祖道中小泊頻年常作客

楊誠

齋句十年四泊百花洲

離懷何地不從公
龍光寶鏐連星紫犀角深

杯得酒紅

明製有百花洲圖犀角杯

今日萬間開廣廈
歡顏臚祝辦香

同

聞滇生將種竹

丁卯君家集橋南
近卜居只須攜蠟屐
未用命巾車
門墮垂垂柳池喧策策魚
會看北窗下新篁出林於

以嶺南花種歸植園畦

我從嶺南歸日憶
花田花煙波七千里
夢落天之涯
園居

地幽僻頗似山人家榆柳蔓藤蘿杉楓拂桐芭獨惜階下
石點綴無奇葩奚奴劇好事囊種來星槎開緘手親植一
雨紛吐芽草木狀各殊見者驚且譁橐駝馬腫背斷斷爭
齒牙豈知東海棗竟類青門瓜珍重比遠客護惜如嬌娃
時恐北土寒灌漑勞疏爬淮橘易爲枳山梨仍變楂蒲萄
逐汗血蒟醬來邛巴雖云登雕盤鄉思紛難遮物性固不
移對花三歎嗟

五月二日奉

命視學湖南紀

恩述懷兼呈壹齋夫子

去年使南海今年使南岳重疊承

主恩弇陋媿

臣

學恭聞

聖人訓照若雲漢倬湘沅富文藻騷雅競追琢杞梓梗枏
材惟視匠所斲臣愚年且少何以酬拔擢歸來謁高堂喜
覩慈顏渥誨語更黽勉離思轉緜邈長沙卑溼地瀕洞連
犖确吾老厭跋涉汝壯堪騰遑再拜祝壽護遙征賦芳葍
偕行四五人論文資商摧伯氏念于役爲我整行幄炎天
五月中火雲鬱斑駁灑然風雨來塵襟爲洗濯嶽嶽當塗
公左田先生時以樞
臣仍直南齋斯道稱先覺步趨久追隨講畫勞頻
數勉以心秤平激彼衆流濁感茲意彌厚但苦道斯卓
香在蘭芷獻瑞期鸞鷟回思

禁苑鐘遠隔江城角浩蕩鯉魚風寄書待秋朔

早發涿鹿

初日射地流丹砂車輪碾塵飛紅霞禾麻葉稀坡隴遮笠
影出沒如鷗鴉老農力田亦何有一畝新收麥三斗天乾
土燥把鋤犁還插柳枝走龍谿時正祈雨
道旁官柳無好枝蟲食其葉人食皮斧斤不足辦一炊那
有清陰爲客垂去年犯雨客東去今日客來汗如雨書生
何事走踈踈眼底房山能笑人

邯鄲盧生祠

秦築長城一萬里讖言乃自盧生起縱譚圖錄延方士戲
弄祖龍如孺子柰何姓名在人間墮入老翁一枕裏四十
年來春夢長那能辛苦炊黃梁平原公子骨已朽邯鄲少

年復何有神仙狡獪人不知世人但笑盧生癡我笑老翁
癡更甚幾時喚起遊仙枕

磁州

滏陽景物似江鄉夾道垂楊影拂塘翠蓋扶花荷葉大綠
鍼穿水稻苗長新犁雨過牛腰健曲岸風回鷺頂涼笑我
衣衫足塵土便思一濯向滄浪

淇水

我來淇水上白石自粼粼惟見浣衣女曾無垂釣人泉留
空澗雨竹闕古園春欲櫂松舟去行歌訪隱淪

雨發汲縣

經旬辭京邑日夕望膏澤聞雷襄國城

順德府

聽雨朝歌驛

回思中山道毒熱愁行役飛沙爍千里大河流一脈野有
半朽禾戶鮮新春麥長官數祈禱明神亦厭射卽今作霖
雨農事猶可獲夜來溜鳴簷曉起涼生席出門雲四垂覲
土澤下尺衣裳豈不濡泥淖非所惜中州稱富庶河北稍
貧瘠但祝天降康庶幾民安宅側身望太行吾邦正炎赫
渡黃河

滎澤荒陂近河渚棗花野店多風雨黑雲捲天雷殷空銀
灣瀉地龍窺戶望洋欲涉客心驚破浪恐逢河伯怒遙山
爲我開霽色斜日照人弄清煦漲痕瀾瀾沙岸平帆影獵
獵風檣聚須臾解纜如發機宛轉乘流若翔羽亦知神靈
意不惡卻念宣防事良苦自從積石厯秦晉賴有崇山爲

夾輔洪濤東注過孟津平原直下臨齊魯此邦首尾受衝
突每歲夏秋勞築堵車牛輓盡千畝竹金帛堆成一抔土
作歌瓠子念災黎獻頌河清酬

聖主安得金堤鞏磐石坐看沙田茂禾黍吁嗟此願不易
償明德神功歎微禹

曉發滎澤北

三日洗頭雨幾人沒髀泥曉聞噪乾鵲坐待見晴霓土潤
河流近村深樹色齊卽看秋種下煙霧出畊犁

經棗林下

沙岡夾官道上有棗樹林雨餘氣蒸鬱亂葉哀蟬吟客行
過其下裂耳誰能禁此木棘刺多卑枝無好音何不奮纖

翼託身嘉樹陰吸露抱清響螳螂休見侵

新鄭縣城南渡河

盈盈一水橫環繞宛陵城雨過漲初落舟來車並行青煙
煤市曉赤日棗園晴羨爾河干叟塵勞媿遠征

請雨辭

并序

汝潁之間旱且久農人乞雨鳴鑼擊鼓相聞於路守
土者憂之予故爲請雨辭二篇告民之哀焉

皇天至仁兮憫我民窮滋我嘉穀兮惟龍之功旱旣大甚
兮龍不我從我欲呼天兮天之門兮九重逢龍之怒兮龍
謂我以不忠坎其擊鼓兮聲聞于空我將何訴兮哀我神
龍

皇天不雨兮我民之尤傷我嘉穀兮亦龍之差旱旣大甚
兮龍不我憂我欲呼龍兮龍之淵深以幽攀龍之轡兮龍
告我以遠遊坎其擊鼓兮願龍之留同我天眷兮哀我民
求

小憩古城人家

騎陽麗亭午疏林息遠籟客行流汗逐渴望時霖沛停驂
憩野廬入室緩衣帶仰看數椽朽幸有四壁賴竈堆隔宿
薪瓶插經年艾牆角古盆盎空腹彭亨大柱頭泥金帖歲
久混埃壒粉殘猶剩字紙破尙餘繪白間墨痕藉兒童弄
狡獪牀低穿可坐睡美夢亦泰醒來步簷隅嘉卉紛蔚薈
陰陰桂與橘蕭灑出塵外因思江漢近漸喜花木藹新麥

聞已春美酒行堪兌便欲問南京飽食銀絲膾

確山縣西堂古柏歌贈蔣琴史同年

慶均

蔣侯庭前有古柏突兀迴若孤生桐其根峭直中梁柱其
末曲蟠爲虬龍清陰磊落覆如蓋不許枝葉交相蒙仰看
恰似葵向日靜對未須松翻風拚依花草自繁植乃知獨
立能包容蔣侯靜者吾同志置酒西堂消客思別來爲憶
筠菴遊坐久忽聞山雨至主人爲我指嘉蔭此木昔年曾
有二不知斤斧誰見摧幸喜風霜獨無累天桃穠李時爭
媚恐爾孤高亦遭棄且爲主人致鸞鳳會看令子如騏驎

琴史次子
裨竹出見

漢陽道中

江漢通南國人聲雜楚歌度山車轍沒爭道擔夫多稻熟
新出出塘深宿雨過翻思河北旱消息近如何

將至武昌寄李篆卿同年

浩

南來看盡漢陽山客久方嗟行路艱幸有朋簪慰風雨
無詞賦動江關腰圍革帶頻移孔手把金魚一破顏黃鶴
樓高橫玉笛知君悵望楚雲間

望黃鶴樓寄呈壹齋夫子

黃鶴何年去先生此舊遊畫圖消壯歲壹齋集有武昌守歲圖詩江漢
有扁舟世仰夔龍健材經杞梓收公會典試楚北祇今庾樓月長

照

蔡園秋

黃鶴樓同幕客作

我從漢口望江樓眼底城頭兩超軼登舟牽纜沂而上轉
盼又與樓相失但怪黃鶴南北飛那知畫鷁中流疾有如
快馬馳峻坂縱轡一發防其逸舟師振舵艤江城漁婦收
颿開水室回望晴川對岸來乃知漢水環山出是時六月
天雨晴樓上遊人正闐溢而我篋與辭徑去卻走官衙不
遑佚意欲攜尊向樓醉翻愁酩酊遭時嫉諸君衮衮謫仙
才客裏登臨看斜日歸來唾手寫煙波令我搔頭思盟櫛
主人宴客鳳皇山餘事煩君鸚鵡筆

江夏道中晚行

日腳崢嶸下山容豁達開亂田尋徑入喬木送村來雨助

連陂水泉疑轉壑雷昨聞九江漲汜濫及黃梅

宿蒲圻縣港口萬年寺次吳文恪公士玉韵二首示

袖山上人

山色向人靜溪聲爭路喧林穿斜日出雨挾溼雲翻欲證

菩提果還叨茶把恩額書二百載光采照空門堂額歇心處三字董

香光書

劫火燒難滅禪鐘寂更喧宰官身再現宗伯字重翻好事

留題詠相憐若愛恩寺燬於火何曙亭光晟縣令再任蒲圻更拓修之此心何處

歇無礙卽眞門

巴陵道上

路入巴陵郡平明四放船水光凝遠樹雨氣逼晴天馬腹

鞭無及魚苗網可憐村農猶指說此是老夫田

雨潦田多淤沒

入湖南界

文章艷說楚騷風沅芷湘蘭入眼中迎候那須勞長吏聚
觀且復鬧兒童江湖滿地漁謳起秔稻連雲鷺嶼通何日
漲消田舍復岳陽樓上看年豐

涉汨羅江

汨羅江水正愁人日暮漁歌且問津猶有荒涼茅屋在幾
家香草薦靈均